



МОЛИТВОСЛОВИЯ

ВСЕМ СВЯТЫМ
Кольского Севера
И ЧТИМЫМ ИКОНАМ



2-е издание



Издательство «Ладан»
Санкт Петербург – Мурманск
2014

ББК 86.372.24-5

Ж74

Ж74 **Молитвословия** Всем святым Кольского Севера и чтимым иконам. – Санкт Петербург – Мурманск: Изд. Ладан, 2014. – 64 с.: ил.

ISBN 978-5-8698-3097-5

Создание молитвенных текстов Кольским святым и чтимым иконам – есть важный итог работы проводившейся в Мурманской Митрополии по прославлению подвижников Крайнего Севера, завершившейся объявлением в 2003 году Собора Кольских святых. Предлагаемый сборник есть плод молитвенных усилий людей, как нашего края, так и за его пределами, любящих Кольский Север и радеющих о возрождении его духовности.

Дальнейшая работа по созданию полноценных молитвенных богослужебных текстов святым Кольского Собора будет продолжаться.

Икона Божьей Матери «Тихвинская – Мурманская»

День памяти 26 июня / 9 июля

ISBN 978-5-8698-3097-5

Тропарь
Божьей Матери ради иконы Ея
«Тихвинской – Мурманской»

Глас 4

Днесь возсия неизреченно / на Мурмане икона Бого-
матере, / и яко светозарным солнцем, / пришествием
тоя озарися вся Земля Полнощная. / Притецем, людие,
все к тихому и доброму пристанищу, / чудному образу
Царицы Богородицы, / верно припадающе и вопиюще:
/ О Всемилостивая Владычице, / за спасительное Твое
смотрение, / чуднаго образа к нам пришествие, / не
остави раб Твоих / и не отрини моления недостойных,
/ ризою Твоею честною нас защити и от всех зол изба-
ви, / молящи Сына Твоего, Христа Бога нашего, // да
спасет души наша, яко Милосерд.

Кондак
Божьей Матери ради иконы Ея
«Тихвинской – Мурманской»

Глас 8

Днесь всемирная радость возсия нам велия: / даро-
ваяся цельбоносная, Владычице, икона Твоя. / Все свя-
тии земли Кольския руке к ней простирают, моляше, /
и с ними страна Полнощная, радуясь, торжествует. /
Темже мы духовно празднуем и тепле вопием Ти: // Не
остави милость Твою от нас, но пребуди с нами во век,
Всеблагая.





Собор
КОЛЬСКИХ СВЯТЫХ

День соборной памяти

15 / 28 декабря

Тропарь
Всем святым Кольским

Глас 1

Светлый сонме подвижников земли Кольския, / Севера тьму сиянием веры озаривший / отцы святии, благочестием преукрашенные, / служителие Таин Божиих благоговейнии, / боголюбивии иноцы и учителяе покаяния, / миряне, чистым житием Создателю угодивший, / языка лопскаго богомудрии просветителие и наставницы, / новомученицы и исповедницы, за Христа души положивший, / в горьких работах даже до смерти Его исповедавший, // молитесь ко Господу спастися душам нашим.

Кондак
Всем святым Кольским

Глас 3

Днесь лик святых, в земле Кольстей Богу угодивших, / предстоит в церкви и невидимо за ны молится Богу, / придите, христоименитии люди, / память их почтим и возопиим к ним: / Радуйтесь, отцы преблаженнии Трифоне, Феодорите и Варлааме, / со многими нашего края небесными покровители, / вы бо, яко звезды святозарныя, во мраце Севера возсияли есте, / словесы и чудесы своими вся просветивше, / и ныне молитесь Господеви / веру Православную zde незыблему соблюсти // и даровати нам велию милость.





Преподобный
ФЕОДОРИТ,
просветитель Кольский

*День памяти 17 / 30 августа
(день блаженной кончины в 1571 году)*

*День именин в постриге 8 / 21 марта
(память сщмч. Феодорита Антиохийского, постриг в 1494 году)*

В Соборах:

*Соловецких святых –
9 / 22 августа*

*Новгородских святых –
в 3-ю Неделю по Пятидесятнице*

*Вологодских святых –
в 3-ю Неделю по Пятидесятнице*

Тропарь
преподобному
ФЕОДОРИТУ

Глас 4

От юности, премудре, прилежно подвизался еси, / пустынный жителю и в телеси Ангеле, / исцеляеши недужныя и души верою просвещаеши, / апостолом сопричастниче, Слово Божие возвестил еси, / всея Лапландии просветителю, / обителей и храмов Божиих зиждителю, / Феодорите, отче всеблаженне, / моли Христа Бога // спастися душам нашим.

Кондак
преподобному
ФЕОДОРИТУ

Глас 5

Обители Соловецкия отрасли многоплодная, / монахов наставниче, покаяния проповедниче, / царя земнаго дары Небеснаго ради Царствия отвергг еси, / красотою душевною в Земли Северной просиял еси, / радуйся, богомудре отче Феодорите, // земли Кольския заступниче теплый.





Преподобный
ТРИФОН
Печенгский чудотворец

*День памяти 15 / 28 декабря
(день блаженной кончины в 1583 году)*

*День именин в постриге 1 / 14 февраля
(постриг в 1531 году на день памяти мч. Трифона)*

В Соборах:

*Новгородских святых –
в третью неделю по Пятидесятнице
Карельских святых – 21 мая / 3 июня*

*Тверских святых –
1-е воскресенье после 29 июня / 12 июля*

Тропарь
преподобному
Трифону Печенгскому

Глас 4

От мятежа мирскаго в пустыню удалился еси, / к немерцающему Свету притекая, / и слез твоих теченьми, отче Трифоне, / пустыни Северныя возделал еси, / пощеньми и из глубины въздыханьми / чудес благодать от Бога прием, / монахов Печенгских родителю и лоплян апостоле, / моли Христа Бога // спастися душам нашим.

Кондак
преподобному
Трифону Печенгскому

Глас 1

Православным смыслом юношская возжеления возненавидев / очистився покаянием и страстей отсечением, / укрепився постом, бдением и молитвами непрестанными, / Святой Троицы обитель воздвигл еси / и Печенгских иноцев Христови чистых представил еси. / И горшее покорив лучшему, / сокрушил еси выа бесом, / и постом возсиял еси в мире, / паче сияния солнечнаго твоя добродетели, / Земли Северныя похвало, // преподобне отче наш Трифоне.

Ин тропарь
преподобному
Трифону Печенгскому

Глас 8

Пути, вводящаго в жизнь, наставник и учитель был еси: / первее бо, преподобне отче наш Трифоне, / пришел еси в часть Норвегския земли / и в последних концев северныя страны языки



просветил еси, / породив водою и Духом Святым, / и священная твоя чада в бесплодной пустыни, / яко древа масличная, насадил еси, / велию обитель Святыя и Живоначальныя, Единосущныя и Нераздельныя Троицы создал еси / и монахов множество собрав. / Тем, яко апостолом и пустынножителем равночестна чтуще тя, / прилежно припадающе, вопием: / моли всех Бога за Русскую землю, за область твою и за вся люди, / почитающия память твою.

**Ин кондак
преподобному
Трифону Печенгскому**

Глас 8

Все твое умное желание к Богу вперив, / Того званию невозвратно от души последовал еси, / в пустыню конечную вселив-ся, / и, тамо ангельски и равноапостольне пожив, / многим путь был еси ко спасению. / Сего ради и Христос тя прослави и даром чудес обогати. / Темже вси вопием ти: / радуйся, исповедниче Христа Бога нашего; / радуйся, граду твоему неколебимое утверждение, Трифоне, отче наш.

**Молитва
преподобному
Трифону Печенгскому**

О Всесвятыя Троицы богоугодниче, о блаженнейший и равноапостольный пастырю, преподобне отче наш Трифоне! Не забуди паствы твоя, но поминай нас во святых твоих и богоприятных молитвах; стадо твое, еже сам, пришествием твоим собрал и упасл еси, сохрани и защити.

Вемы бо, угодниче Божий, како православным смыслом юношская возжелания возненавидев, клеветы и вои своя оставил еси. Како ангелов подобника и бесов противоборца прови-

дя тя всея твари Зиждитель на покаяние огласил тя, яко втораго Павла, и человеколюбно к Себе призва, привел тя вскрай Северныя страны, где просветил ты еси святым крещением неведущий Творца лопарский род, за еже, во утверждение христианския веры, многа изгнания и злоключения подъял еси.

И близ реки Печенги в пустыню вселив-ся, братию же из многих градов и весей собрав, велию обитель Святыя Троицы воздвигл еси, и, при отшествии к небесным селением, о посещении твоея обители пророчества дар от Бога восприял еси, по смерти же многа чудеса и цельбы с верою просящим на мори и на суши сотворил еси и ныне твориши.

Темже молим тя, не забуди присещати чад твоих, моли за ны, преподобне отче, приходящия к тебе с верою, и за вся христианы, яко имеяй дерзновение к Безсмертному Царю Христу, всех Богу; не премолчи за ны ко Господу, и не презри нас, верою и любовью чтущих тя и поминающих святую память твою. Аще бо телом и преставился еси от нас, и мощи твоя до времени незримы нам суть, но и по смерти, живой духом, выну чудодействуеши. Молитвами твоими сохраняй нас от стрел и козней вражиих, и всякия прелести бесовския и от враг видимых и невидимых.

О пастырю наш добрый! Понеже выну в Троице славимому Богу, при Престоле Его непостижимаго величества, неотступно в молитвах предстоиши, усердно к тебе прибегаем и просим: умоли и испроси нам время к покаянию, да в час исхода души преждем от земных к небесным, от мытарств же воздушных и вечныя муки избавимся, и Небесному Царствию наследницы будем со всеми от века Богу угодившими.

О, преблаженне и преподобне отче наш Трифоне! Не презри и ныне нас, притекающих к тебе, яко да молитвами твоими и помощию спасаеми, славу и благодарение, хвалу и поклонение за вся в Троице Единому Богу, всех создателю возсылаем, Отцу и Сыну и Святому Духу, ныне и присно и во веки веков.



Преподобномученики

Иона и Герман Печенгские

*День памяти 2 / 15 декабря
(день мученической кончины в 1589 году)*

Преподобномученик

игумен Гурий

и с ним 116

преподобномучеников

Печенгских

*День памяти 9 / 22 декабря
(день мученической кончины в 1589 году)*

*В Соборе Новгородских святых –
в 3-ю неделю по Пятидесятнице*



Преподобный
ВАРЛААМ
Керетский чудотворец

*День памяти 6 / 19 ноября
(день блаженной кончины в 1599 году и день именин в постриге в честь
прп. Варлаама Хутынского)
и День обретения мощей 15 / 28 января 1725 года*

*В Соборе Карельских святых
(21 мая / 3 июня)*

Тропарь
преподобному
Варлааму Керетскому


Глас 1

Божественною свыше просветився благодатию, /
евангельски Христу последовал еси / и Того во всем
воли повинулся еси, / и сего ради восприим силу на вра-
га сопротивнаго, / не убоялся еси морския тяготы и сту-
дени, ниже уклонися, / в своем плаче по Бозе не усыпая,
/ в мале ладнице по водам шествие творил еси, / против
зельного обуревания плавав, / и равноангельное житие
пожив, / темже и по преставлении источаеши чудес бла-
годать, / да вси тебе возопием: Варлааме преблаженне,
// моли Христа Бога, да спасет души наша.

Кондак
преподобному
Варлааму Керетскому

Глас 1

Все умное свое желание к Богу вперив, / житейские
молвы до конца отринул еси, / в молитвах и слезах и
злостраданиях плоть свою изнуряя, / добре подвизав-
ся противу невидимаго врага козней / и, победив я,
путь морской от ядовитаго червья человекам без вреда
сотворил еси, / и веселяся пришел еси к небесным чер-
тогам, / где ныне, со ангелы Святей Троице предстоя,
молишия непрестанно, / сохраняя нас от враг види-
мых и невидимых / и ненаветны соблюдая от скорбей,
зол и болезней, / да твоими молитвами спасемся, Вар-
лааме преподобне, отче наш.



**Ин тропарь
преподобному
Варлааму Керетскому**

Глас 1

Божественною свыше просветився благодатию, преподобне,
/ мир оставил еси, / житейскую печаль и всяк мятеж мира сего /
любве ради Христовы со дерзновением отвергл еси, / евангельски
Христу последовал еси, / и, Того ярем взем, во всем воли Его
повинулся еси, / и весь разум и сердце к Нему неуклонно возло-
жил еси, / Христа ради тело свое изнуряя постом и бдением, в
молитвах своих не усыпая, / Бога милостива творя и Пречистую
Богородицу Молебницу предлагая, / и сего ради от Бога воспри-
ем власть и силу на сопротивнаго врага, / не убоясь воздушныя и
морския тяготы и студени, ниже уклонися, / и морскою пучиною
в мале ладице по водам шествие творя, / против зельнаго обуре-
вания плаваше, / промыслением Божественнаго разума направ-
ляемь, / и около Святаго Носа непроходимый путь морской / от
ядовитаго червья / благопроходен человеком без вреда сотворил
еси молитвами своими, / и многим терпением во временней жиз-
ни подвиг совершил еси, / и, равноангельное житие пожив, / тем-
же и по преставлении источаеши чудес благодать / иже верою
приходящим к тебе / Варлааме, преблаженне отче наш, / вопием
ти: моли Христа Бога, / да спасет души наша.

**Молитва
преподобному
Варлааму Керетскому**

О, преподобне отче наш Варлааме, яко имеяй дерзновение
ко Творцу, Избавителю всех, Иже в Троице Святей покланяемо-
му истинному Христу Богу нашему, помяни нас, грешных и не-
достойных щедрот Его, у страшнаго престола Господа Славы и

Судии Всех, идеже ты в сонме праведных предстоиши. Да подаст
нам непотребным, погруженным в бездну греховную, покаяние
сердечное, слез изливание и пламень стыда во утробах наших. В
сим же пламене да сгорят вся наша беззакония и неправды, яже
соделали есмы во вся дни живота нашего, да не будем наследни-
цы пламене геенскаго, готоваго пожрети души наши. Молим
тя, отче святой, умоли Господа Вседержителя даровати нам сил
и мудрости воеже избавиться от всякаго тлетворнаго страстна-
го действия, от поползновения греховнаго. Упроси, отче Варлаа-
ме, Всемиловитаго Бога даровати нам ревнование о житии рав-
ноангельском, о стяжании молитвы чистыя, о пребывании в по-
сте и добродетелех христианских. Не премолчи вопия за ны ко
Господу, да с терпением течем на подлежащий нам подвиг имея
в житии твоём образ назидания не токмо людем мирским, но и
ликом иноческим. Научи нас, богоносне отче Варлааме, каятися
твоим покаянием суровым, полагатися несумненно на волю Го-
спода нашего, яко да и малая лодейца смертнаго сего телесе на-
шего без препятія одолеет бурный океан греховных страстей
мира сего и к тихому пристанищу притечет, идеже ты и вси от
века Богу угодившия пребывают во Христе Иисусе Господе на-
шем, Емуже подобает всякая слава, держава честь и поклонение
со Безначальным Его Отцем, и со Пресвятым и Благим и Жи-
вотворящим Его Духом во веки веков. Аминь.

**Ина молитва
преподобному
Варлааму Керетскому**

О Преподобне отче наш Варлааме, яко имеяй дерзновение
ко Творцу, Избавителю всех, Иже в Троице Святей покланяе-
мому истинному Христу, Богу нашему, помяни нас в молитвах
своих и всех нас моления, Богу воссылаемая, прими и принеси
я ходатайственне. Молим тя, избави нас от всяких напастей, и на

мори от зельнаго обуревания, и от всех видимых и невидимых враг ненаветны соблюди, яко да твоими молитвами, святе, согрешений наших оставление получим и вечных благ сподобимся благодатию и человеколюбием Господа нашего Иисуса Христа, Ему же слава со Отцем и Святым Духом ныне, и присно и во веки веков. Аминь.



КАНОН¹
преподобному
ВАРЛААМУ КЕРЕТЬЦКОМУ,
новому чудотворцу

Тропарь (общий)

Глас 8

Пустынный житель и во плоти аггел, чудотворецъ показася, богоносе, отче нашъ, Варламе. Пощения ради и бдения, и молитв небесныя дары прием, исцеляеши недужных и души приходящих ти с верою. Слава давшем ти крепость, слава венчавшем тя, слава деющему тобою всем исцеление.

Слава и ныне, Богородицен: Стена непобедимая нам христианом еси, Богородице, Дево.

Ему же краегранесие: Похвалу пою Варламу, новому чудотворцу Керетцкому.

До 9-й песни сложено мерою и амьфикою по акростихиде, а в девятой песни имя списавшего.

Песнь 1

Глас 8

Ирмос: Море огустевая, погрузив со оружием гордаго фараона и люди спасе от работы и введе я в гору святыня, вопиюща: «Поем тебе, Богу нашему, песнь победную, яко прославися».

Препетая соестественная Троице, иже паче ума дары рабом си дая и моему мрачному уму светлую посла благодать, всех страстей очищающую, песнь ныне начинающи ми.

¹ «Канон преподобному Варламу Керетьцкому, новому чудотворцу». Сочинение Соловецкого аримандрита Сергия (Шелонина) (1-я пол. XVII в.). Рукописное собрание Псковского музея-заповедника. Ф. Никандровой пустыни. № 292. Лл. 413 – 420 об.

Освящен убо быв Божественною благодатию послужити святому жертвенику, всесожжение словесное принесл еси приятно Богу, яко же Аарон по закону агнца во всесожжение, прообразая волное страдание и смерть Христову за весь мир.

Слава: Христову плоть роздробляя рукама, и служителя сего истинный явлься, возношения в премирная вознося и оттуду и мир людям своим снося, Варламе пречюдне.

И ныне. Богородичен: Великий во пророцех Моисей ты написа иногда: Скрижаль богообразне, свещник света, и сень, и жезл процветший, Всенепорочная, и ручку, маннуносящую, Ею же возведохомся от земли к высоте.

Песнь 3

Ирмос: Утвержен рукою своею Слово Божие небеса, на утверждение истинна разума, утверди наша сердца на тя надеющихся.

Агнца несквернаго и богоприятнаго руками заколая, аггельскому житию поревновав непрестанными молитвами, зритель и жрец сподобися быти благодатию совершаем Святаго Духа.

Лукавый змий не терпяше зрети тя, выну Богу предстояща и молитву о людех приносящу, подходит на твою супругу, вадя насмешение странно. Ты жи ю яко узрев с яростию, на ню устремився, поражаеши ю смертною язвою и гробу предаеши.

Убийству убо совершившися и земли тело предав, отходиши во град в Колу к тамошнему иерею, и вествуя о убийстве и прося прощения, слезами землю омокая, о содеянных ти в ярости и невоздержании.

Повинувся убо иерей о содеянных ти и дает ти иго легко: еже мертваго носити во гробе, дондеже изгниет тело умершия, самому же в посте и молитве пребывати, и таково воздержание имети, яко и рыбе точию единою на Пасху причащаются.

О убийстве убо мертваго таково запрещение приим, течаща, радуясь, и, сие откопав, в судно вложив во гробе, сам же во второй устремився, с мертвым шествуя летом дванадесят путей по окияну морю по непроходным местом.

Богородичен: Юже лествицу древле Ияков виде, прообразующу о тебе, Богомати, рече: «Степень Божия сия, яже достойно слышиши. Радуйся, Обрадованная, Господь с Тобою».

Седален

Глас 8

Носиши за плещми мертвое тело, подобяся древним скитским отцем, превитая по горам и по вертепам, яко птица, терпя смрад и всяку скорбь от мертвого телесе, яко же Никифор, великий патриарх, от разбойника умершаго в вертепе. Но он убо три месяцы, ты же три годы, дондеже мертвое тело изгни до конца, и тако паки земли предаде, тем исцеления дар от Господа сподобися прияти, Варламе преподобне, отче наш, моли Христа Бога грехов оставление подати чтущим любовию святую память твою.

Слава и ныне. Богородичен: Яко двуедину.

Песнь 4

Ирмос: Услыша же, Господи, слухтвой и убояхся, яко неизреченным советом Бог сый присносущен от Девы произоде, воплощся. Слава славе Твоей, слава, Христе, пришествию Твоему.

Видел еси окиянскую пучину нечисту и человеки непроходиму от множества червия, иже остовы вертети карабли естество навывьших. Яко ж Лествичный Иоанн вопиеть: «Сей же священные воды кроплением отгнал еси на пучину моря.

Аще и естеством непобедими червие быша, но твоя молитвы Богу послушавши, отбегнути и отойти повелевши им не в про-

ходимая места от Святаго Носу, идеже тма и мрак глубок без престани бывает.

Руце, иногда окровавленнии убийственною женскою кровию, ныне же чисти и святы, воздеши к вышнему о нас моля, преподобне, и испрошая от того благодать обрести, нам грехов оставления и будущих благ получитьи молитвами твоими.

Людие возрадовашася радостию неизглаголанною, получивши путь морской строен и благопоспешен, и благополучен, тя, своего заступника, воспевающа и Христа величающа.

Аще не бы ты предстал и помог, не бы толиких грузущих червий избавихомся. Ныне же тебе благодарная возглашаем, яко корабли с песнию отпускающе вспять возвращающесе целы и невредими приемлюще зовем: «Слава, Христе, пришествию твоему».

Мужеством души в веру вооружився, бурю и дождь и всякую воздушную нужду терпя, потщался еси сохранить заповедь отца своего духовнаго и того ради приял от Вседержителя Бога венцець победный на страсти и на бесы исцеление.

Богородичен: Устави неуставное смущение, чистая Мати Божия, еже к Сыну Ти направляющи движение, воспевающих: Слава славе Твоей, слава, Христе, пришествию Твоему.

Песнь 5

Ирмос: Мрак души моя отжени, светодавче Христе Боже, зачалобытнующую тьму. Разгнав бездныя, издаруй ми свет повелений твоих, Слове, да утренюя, прославляю тя.

Носиши мертваго, яко жива, в пустыню в Чюпу с собою и тамо молитвою на врага вооружашеся, нестерпимыя его стрелы сокрушая постом и терпением, дондеже приял, преподобне, помощь от вышняго.

Обновляешися яко орел, преподобне, измывся и очистився в пустыни от всех страстных деяний, и яко елень быстротекий ко источником вод очищаяся змииныя яди.

Видел еси зиждему святым Трифаном обитель в Печенге, за окияном морем, и тамо устремися видети того труды и подвижи. И пребыв немного время, пророчески тому о составлении обители прорече:

Оставляеши бо трифаново селение и возвращаешися паки к Керети, – вся тому изрек. О Трифане, сподобился еси обитель воздвигнути и братию собрати, будут бо людие и села зле неукротимы, яко дивии звери, твоей ярости и острожелчию подблящася.

Море убо на плещу своею тебе ношаше ис Печенги в пустыню в Чюпу, влеком корабли своими струями, идеже ядовитыя черви очистил еси и по тоням телеса мертвых востающа бесовским действием виде и сим уснути до Христова втораго пришествия повелеваеши, да не бессмертно пребудет злое, яко ж рече иже богословию тезоименитый Григорие.

Богородичен: Уловити мя всегда ищет прелукавый и от того мя сетей исхити, Владыце, и Божественным кровом крилу Твоею цела соблюди.

Песнь 6

Ирмос: Бездна поседняя и прегрешений буря смущает, и во глубину нужную реет мя нечаяние, но сам крепкую руку ми простри, яко Петрови ото тля, Боже мой, возведи мя.

Чювственные страсти победив воздержания броздами, чюдодейственне Варламе, чистотою душевною божественно вооружився, стяжав безстрастие и целомудрие, им же Богови паче приблизився.

Юности цвет, поты и труды умертвив воздержанием, в вышний вниде чертог во одежду оболчен, достойну звания, на ню ж и зван бысть украшен добродетелми, в невестнице неизреченныя славы возглегл еси.

Добродетели труды и поты, Варламе, покой со всеми святыми приемля, их же и возвесели своим житием.

Образы и подобие к добродетели, отче, возводя всех к высоте божественного рачения, добродетели прилежати наказуя.

Богородичен: Тебе общую любочестия, Всенепорочная, нашего естества вси славим, устна едина бывша, и едино согласие совершающа воспевающих Тя, едину Матерь неискусомужную [бывшую].

Кондак

Глас 4

Волнений множество не влажно проходя, безплотных враги струями слез твоих крепко погрузил еси, богомудре Варламе преподобне, и чудес дар прием, исцеляеши страсти всякия, моли непрестанно о всех нас.

Икос. Отверзи ми устне, преблаженне, богоприятными ти молитвами предстоя Богови, всеславне Варламе. Да воспую божественное твое житие и возглаголю достойной добродетели твоей, еже на земли Христа ради совершил еси, преподобне, столп бо явился и правило светло иноком, равно аггелом, стяжав житие, в незаходимая воистинно вселився, моли непрестанно о всех нас.

Песнь 7

Ирмос. Дети благочестивыя в Вавилоне телу златом не поклоняшася, но посреде печи пламенны прохлаждаеми, песнь воспеваху, глаголюще: Отец наших, Боже, благословен еси.

В молитвах бодренное и в пощении крепкое, и терпение во искушениях неослабное, ума чистотою, преподобне, показался еси, земля бо и земных достойно отступль, небесное обрет, наслаждение воспевая: Благословен Бог отец наших.

Острыя имея к Богу внимати страсти душетленные усыпил еси, и рукоя ти благоплодия пожал еси, питая благочестно восхваляющих тя и поющих: Благословен Бог отец наших.

Ревностию Христовою ярость поострив непреклонно слезами и слезными каплями истинного плача. Все ярости и напрасньства пламень погасив желания безчестия несытна, и устну молчанием, вопияше: Благословен Бог отец наших.

Целомудрие, отче, притяжав, им же на божественную любовь возшед, прият дары исцеляти недуги душ и телес наших, ими же к Богу приблизитися можем вопия: Благословен Бог отец наших.

Богородичен: Углем Исая от Серафима от олтаря очищается, возопи велегласно: Се девая во чреве примет и родит сына и нарекут имя ему Еммануил, яже есть сказуемо: С нами Бог. Ему же вопием: Благословен Бог отец наших.

Песнь 8

Ирмос. Мосикейским арганом согласящим и людем, без числа кланяющимся телу сущу на молебне, трие отроцы песнословяху: Господа пойте и превозносите Его во веки.

Кроток и милостив, и чист быв, кротких землю достиг, отче, укроти настоящую бурю сердцу моему. Да в тишине божественней быв, песнословлю твоя подвиги воспевая: Господа пойте и превозносите его во веки.

Естество плотьское повинув духови постом и воздержанием, душу же божественными дарованми просветив, превысок умом сущих в вещех явлься, невещественна дарования Духа Святаго приял еси, воспевая: Господа пойте и превозносите его во веки.

Рака твоя источает верным исцеление, память же твоя, блаженне, сияющи паче солнца и всем души просвещающи, и мира мысленного восхищающи поющих: Господа пойте и превозносите его во веки.

Естеством добродетелей любве сопрягся отцу Трифану в духовных ему исправлениях в пуге моря с ним оземствуя с причастное души очищающи, воспевающе: Господа пойте и превозносите его во веки.

Целиши независтно верно призывающи ты, целитель от Бога показася, очистник блаженне и прогонитель лукавым духом, яко звезда всесветлая от пустыни воссияв чудес лучами, просвещая вопиющих: Господа пойтя и превозносите его во веки.

Кротостию, отче, наветы нося, терпя же и своя на тя встающая, отческим нравом последуя, тех житие в себе имея, приим от Бога действие благодати, пояше: Господа пойтя и превозносите его во веки.

Оружие убо пение, молитву же – стену, непорочную слезу – умывание имел еси, омывалище сквернам душевным, память же смертную сожителницу стяжав, преподобне, ее же ум очищъ Бога зрети сподобися, поя: Господа пойтя и превозносите его во веки.

Морское ядро освятил еси, преподобне, кроплением священных воды, яко паучину червие отгоня, не терпяще бо ти крепости духовныя зрети и нечувственная отбегающу Господу, ты всем прославльшу яко верна своего раба: Господа пойтя и превозносите Его во веки.

Богородичен: Ум убо нерожденный, Отец образно премудрым провещася, Слово же собезначална, соестественный Сын и Дух Святой, еже в Деве от Слова созда воплощение.

Песнь 9

Ирмос: Тя, браку неискусимую, Матерь Бога Вышнего, ты паче ума рождшую Словом Сущаго Бога и вышшую пречистых сил, немолчными славословении величаем.

Слезная капля гасило стяжав еси, воистинну страстным розгорением и любовью огня Божественнаго росе совокупився Христу Богу нашему, тем же ты чем, Варламе богомудре, и верою ублажаем.

Единое любви Христовы приложив свою душу, Варламе преподобне, и исполнитель заповедей Божиих многих чудес приял еси благодать, всехвалне, тем же ты почитаем.

Рака мощей твоих, Варламе, источник показася исцелением, к ней же всяк притекаяи, яко от крина воды почерпает исцеление независтно и избавляется всяких страстей душевных и телесных. Сего ради ты ублажаем, преподобне.

Господь прославльши своего угодника, яко ни гробу ходатаю забвению того добродетели сокрыти, но трубы яснейши вопием: Истекающими от него знаменми чудне не точию же ближняя, но и дальняя оглашая, проповедавая мужа подвиги и труды.

Иже память твою священную творящим, отче, не престаи моля Избавителя даровати согрешением оставления и небесное царство воприяти, идеже глас празднующих веселит вся.

О двоица присноблаженная, равночестная отца, Трифане и Варламе, яко едино блаженство имущих от Бога, версто предобряя, нас призывающих ваю от всех лютых спасати я теплым предстательством вашим вас восхваляющих.

Богородичен: Стешняет мя широта величий твоих, Владыце, подавляя слово от частости, и преславно ми приходит недоведети от благодушства, тем же иже толико Ты возвеличившая славим.

Тропарь (общий)

Варламу Керетцкому, новому чудотворцу

Глас 8

О тебе, отче Варламе, известен бысть спасения образ, восприимши бо крест последовал еси Христу, творящи же и учащи, еже презрети плоть, преходит бо прилежати же о души вещи безсмертней, тем же со аггелы радуется, преподобне, дух твой.



Преподобный
ЕВФИМИЙ
Корельский, Кольский

День памяти 18 апреля / 1 мая. (†1435 год)

*День именин в постриге 20 марта / 2 февраля
(память прп. Евфимия Великого)*

В Соборе Карельских святых – 21 мая / 3 июня

Тропарь
преподобному
Евфимию
Корельскому, Кольскому

Глас 4

Многосветлыми лучами / блистают деяния твоя, преподобне отче Евфимие: / брега в последних концах Северных страны / церквами и скитами, яко древами масличными, украсил еси. / Долготу путную и опасности моря ни во чтоже вменяя, / восхваляя пустынножития рачительство, / дошед даже до Норвежския земли, / не убоялся еси враги крепкия и бранноискусныя, // облистав благочестия светлостьми пустыни Полунощныя.

Кондак
преподобному
Евфимию
Корельскому, Кольскому

Глас 1

Взыскуя Христа, вожденнаго бисера, / и Того любовию уязвися, преподобне Евфимие, / устремился еси в суровыя пустыни / Севернаго помория, / древним начальником скитстим поревновав, / леса и пустыни облагоухал еси / богоугодными молитвами твоими, / тем же и Христос тя прослави: / вожденных горних чертогов достигл еси, // и нас учи небесному восходу.





Преподобные
**АСТЕРИЙ (АКСИЙ),
АВКСЕНТИЙ
и ТАРАСИЙ**
Кашкаранские, Соловецкие

*Соборная память в Соборе Кольских святых –
15 / 28 декабря,
в Соборе Соловецких святых –
9 / 22 августа
и в Соборе Новгородских святых –
в 3-ю неделю по Пятидесятнице*

Тропарь
преподобным Астерию (Аксию), Авксентию и Тарасию
Кашкаранским, Соловецким

Глас 4

Постническое и равноангельное житие приемше, / преподобнии отцы Астерие, Авксентие и Тарасие, / в Поморие пустынное удалилися есте, / аки в тихое пристанище, / на наволок Кашкаранский вселилися есте, / и многая лета пожили есте, / и непрестанная молитвы яко копие в руках имуще, / крепко победили есте бесовская ополчения, / благодать приемше целити недуги душ и телес наших. / Тем зовем вам: // Радуйтесь, преподобнии отцы Астерие, Авксентие и Тарасие, монахов удобрение.

Кондак,
преподобным Астерию (Аксию), Авксентию и Тарасию
Кашкаранским, Соловецким

Глас 8

Троице святая Кашкаранская, / Соловецкаго отока отрасли многоплодная, / в правиле иночестем возсиявшая светло, / преподобнии отцы Астерие, Авксентие и Тарасие, / поминайте ны, любовь хвалящая вас.

Тропарь
преподобному Астерию (Аксию) Кашкаранскому,
Соловецкому

Глас 1

Яко звезде пресветлей тезоименитый, / возсиял еси в Полунощней земли, преподобне отче наш Астерие, / и монашескими добродетельми первее украсився, / на Терстем бреже пустынем аки в тихое пристанище вселился еси, / и тьму ночи духов отгнал еси, / и своею смертию от тяжкаго недуга люди поморстии исцелил еси, / душу свою за други своя полагая. / Не умолчи убо и ныне, / о недужех и скорбех наших моляся, Астерие преподобне.





Новомученики и исповедники КОЛЬСКИЕ

*Память в Соборе новомучеников и исповедников Российских –
в воскресенье 7 февраля / 25 января,
или в ближайшее воскресенье после этой даты*

Тропарь
новомученикам и исповедникам
КОЛЬСКИМ

Глас 4

Святые новомученицы и исповедницы Кольстии, /
светолепнии архиереи и священники, / иноцы, иноки-
ни и миряне, / вернии Господеви мужие, жены и чада, /
на Севере жестокими гонители собраннии / и в ка-
торжных работах умученнии /, за Христа кровь проли-
явшии, / отцы, братие и сестры наша, / за Господа
смерть приявшии, / молитве Человеколюбца Бога // из-
бавитися нам от всякаго зла покаянием.





Преподобномученик
ФЕОДОР (Абросимов),
Печенгский

*День памяти – 1 / 14 октября
(день мученической кончины в 1940 году)*

*В Соборе новомучеников и исповедников Российских –
в воскресенье 7 февраля / 25 января,
или в ближайшее воскресенье после этой даты*

Тропарь
преподобномученику
ФЕОДОРУ (Абросимову),
Печенгскому

Глас 5

Преподобномучениче Феодоре, / злострадания от
безбожных и горькие работы претерпел еси, / Церкви
послушание даже до смерти явил еси, / сего ради вен-
цем мученическим венча тя Христос Бог, / Егоже моли,
богодарованный заступниче земли Кольския, // да
очистимся от всякия скверны покаянием.

Кондак
преподобномученику
ФЕОДОРУ (Абросимову),
Печенгскому

Глас 8

Вземше крест свой, Христу последовал еси, / мона-
шеское житие и вольное страдание паче сладости мира
сего возлюбил еси, / веру Христову даже до конца ис-
поведал еси, отче Феодоре, // избави нас от бед молит-
вами ТВОИМИ.





Преподобномученик
МОЙСЕЙ (Кожин),
Оленицкий

*День памяти – 25 августа / 7 сентября
(день мученической кончины в 1931 году)*

*В Соборе новомучеников и исповедников Российских –
в воскресенье 7 февраля / 25 января,
или в ближайшее воскресенье после этой даты*

Тропарь
преподобномученику
МОИСЕЮ (Кожину),
Оленицкому


Глас 1

Святых Таин Христовых верный служителю, / покаяния проповедниче и края Кольскаго печальниче, / преподобномучениче Моисее, // моли Милостивого Бога спастися душам нашим.

Кондак
преподобномученику
Моисею (Кожину),
Оленицкому

Глас 2

Уподобился еси пророку Моисею, / душу свою за погибающую паству положил еси, / узы темничные и смерть за Христа претерпел еси, / спасай нас молитвами твоими, отче Моисее, // пастырю наш преблаженный.





Местночтимый
святой преподобный
БЕЗЫМЯННЫЙ ИНОК
Терский, Кашкаранский

*Память в Соборе Кольских святых –
15 / 28 декабря*

Тропарь
преподобному
БЕЗЫМЯННОМУ ИНОКУ
Терскому

Глас 8

В море Ледоватом успение обрел еси, Безымянне, /
в телеси нетление стяжал еси, преподобне, / неведо-
мый миру иноче земли Терския, / но Богови ведомый и
чудесами явленный. / В ловитве рыбней помощниче
скорый / и целителю усердный в немощах и болезнях, /
преподобне Безымянне иноче, // моли Христа Бога
спастися душам нашим.

Кондак
преподобному
БЕЗЫМЯННОМУ ИНОКУ
Терскому

Глас 2

Всем от века прикровенно Богу угодившим / похва-
ло, и память, и радование, / Безымянне Иноче-заступ-
ниче, / помяни имена наша пред Христом Господом, //
прилежно чтущих память твою.



МОЛИТВОСЛОВИЯ

ВСЕМ СВЯТЫМ Кольского Севера И ЧТИМЫМ ИКОНАМ

Редактор – *епископ Митрофан (Баданин)*

Художественное оформление и верстка – *С. Алексеев*

Подписано в печать 14. 04 2014

Формат 60x90/8. Печ. л. 8. Тираж 100 экз.

Печать офсетная.

Издательство «ЛАДАН»

Санкт-Петербург, ул. Достоевского, 44

тел./факс +7 (812) 320-60-13

e-mail: Ladan_SPb@mail.ru

www.LadanSPb.ru

Магазин издательства: Санкт-Петербург, В. О., ул. Камская, 9

(у входа на Смоленское кладбище)

(911) 285 93 40

Книга-почтой: Санкт-Петербург, 196105, а/я 93

Заказать книги можно на сайте издательства

или по телефону (911) 819-66-12

Склад издательства: Санкт-Петербург, ул. Белоусова, 6,

м. «Кировский завод»

Тел. (812) 785-20-04

Отпечатано в типографии «Моби Дик»

www.MobyPrint.ru